



**KEMENTERIAN PENGANGKUTAN
MALAYSIA**

**Jumaat, 27 Mac 2020
Untuk Siaran Segera**

**KENYATAAN MEDIA
MENTERI PENGANGKUTAN MALAYSIA**

**TAJUK : PERUNTUKAN RM250 BILION KEPADA PRIHATIN
DEMI RAKYAT DAN NEGARA BERDEPAN PANDEMIK COVID-19**

Pertama sekali, Kementerian Pengangkutan Malaysia ingin melahirkan setinggi-tinggi penghargaan di atas keprihatinan kepimpinan negara dalam meringankan beban rakyat. Terima kasih diucapkan kepada YAB Perdana Menteri, seluruh barisan Kabinet dan semua yang terlibat dalam merangka inisiatif prihatin rakyat ini.

Sepertimana perutusan khas YAB Perdana Menteri Tan Sri Muhyiddin Yassin mengenai Pakej Rangsangan Ekonomi Prihatin Rakyat atau PRIHATIN dalam keadaan kita berdepan pandemik Covid-19, sebanyak RM250 bilion diperuntukkan yang akan memberi manfaat kepada rakyat Malaysia secara keseluruhannya.

Daripada jumlah ini, hampir RM128 bilion disalurkan untuk melindungi kebajikan rakyat, RM100 bilion untuk menyokong perniagaan termasuk Perusahaan Kecil dan Sederhana (PKS) dan RM2 bilion untuk memperkukuh ekonomi negara. Manakala sebanyak RM20 bilion telah diumumkan dalam pakej rangsangan sebelum ini.

Kementerian Pengangkutan amat peka dan menyedari segala isu atau permasalahan melibatkan orang ramai khususnya di sektor pengangkutan. Saya telah mengetengahkan isu-isu berbangkit dalam mesyuarat Kabinet serta Mesyuarat Khas Menteri-Menteri mengenai Pelaksanaan PKP sebelum ini.

Merujuk kepada Pakej Rangsangan Ekonomi Prihatin Rakyat, ternyata tiada rakyat yang dipinggirkan, termasuk para pemandu e-hailing yang terjejas pendapatan harian mereka. Bagi meringankan beban mereka, **Kerajaan akan memberikan bantuan secara one-off sebanyak RM500 kepada 120,000 pemandu e-hailing dengan peruntukan sebanyak RM60 juta. Dalam Pakej Rangsangan Ekonomi sebelum ini, kerajaan telah mengumumkan pemandu teksi akan menerima bayaran one-off sebanyak RM600 mulai 1 April 2020.**

Kerajaan juga akan memperkenalkan **Program Subsidi Upah untuk membantu majikan mengekalkan pekerja.** Dalam keadaan yang sukar ini, Kerajaan tidak mahu lihat pekerja dibuang kerja dan hilang pendapatan.

Menerusi program ini Kerajaan akan menyediakan upah sebanyak RM600 sebulan bagi setiap pekerja untuk tempoh tiga bulan. Program ini dikhususkan kepada pekerja yang berpendapatan di bawah RM4,000 dan majikan yang mengalami penurunan pendapatan lebih 50% sejak 1 Januari 2020.

Majikan mesti memastikan mereka tidak membuang pekerja atau mengarahkan mereka mengambil cuti tanpa gaji bagi tempoh tiga bulan selepas program ini dilaksanakan. Selain itu, majikan juga tidak dibenarkan memotong gaji sedia ada pekerja. **Langkah ini dijangka memanfaatkan 3.3 juta orang pekerja termasuk mereka yang bekerja di sektor pengangkutan awam dengan peruntukan sebanyak RM5.9 bilion.**

Bagi membantu Perusahaan Kecil dan Sederhana, termasuk usahawan mikro, Kerajaan dan Bank Negara Malaysia akan menyediakan dana tambahan berjumlah RM4.5 bilion yang merangkumi lima inisiatif utama. Antaranya, menyediakan dana tambahan sebanyak RM500 juta di bawah Skim Kredit Mikro yang menjadikan jumlah keseluruhan RM700 juta bagi pembiayaan mudah. Skim ini akan dikendalikan oleh Bank Simpanan Nasional dengan menawarkan kadar faedah 2% sahaja tanpa cagaran.

Syarat kelayakan pinjaman juga dilonggarkan dengan minimum enam bulan operasi berbanding setahun operasi. Amaun pembiayaan juga ditingkatkan daripada maksimum RM50,000 kepada RM75,000 bagi setiap usahawan. **Inisiatif ini adalah terbuka kepada semua usahawan mikro dalam semua sektor perniagaan termasuk pengusaha taska, operator bas dan teksi, industri kreatif dan peniaga atas talian.**

Selain itu, Kerajaan juga bersetuju memberikan **pengecualian sewaan selama enam bulan untuk semua premis milik Kerajaan Persekutuan** seperti kantin sekolah, taska, kafeteria, kedai serbaneka dan lain-lain. Ini termasuk semua premis milik agensi dan badan berkanun Kerajaan Persekutuan. Kerajaan Negeri, pihak berkuasa tempatan dan GLC juga digesa memberikan pengecualian yang sama.

Bagi menyahut inisiatif yang telah diumumkan oleh kepimpinan negara, Kementerian Pengangkutan melalui agensi-agensi seperti Lembaga Pelabuhan Johor (LPJ) dan Perbadanan Aset Keretapi (PAK) juga ingin mengumumkan inisiatif tambahan kepada pakej rangsangan ekonomi ini. Antara inisiatif oleh Kementerian Pengangkutan dan agensi adalah seperti berikut:

- i. **LPJ akan memberikan pengecualian pembayaran sewa flat LPJ bagi semua penghuni dalam tempoh enam bulan mulai April 2020. Pengecualian ini melibatkan 143 bilangan unit rumah bernilai RM370,425.00.**
- ii. **PAK juga akan mengecualikan pembayaran sewa aset selama 6 bulan bermula April 2020 yang melibatkan 2,200 penyewa dengan anggaran sewa berjumlah RM15 juta.**

Kedua-dua inisiatif ini akan memberi manfaat dengan meringankan beban keluarga yang kesemuanya terdiri daripada golongan B40 dan M40.

Dalam perkembangan sama, **Kerajaan juga akan meneruskan pelaksanaan semua projek yang diperuntukkan dalam Belanjawan 2020 termasuk ECRL, MRT2** serta Pelan Gentian Optik dan Kesalinghubungan Negara. Usaha ini selaras dengan fokus Kerajaan untuk memastikan pertumbuhan ekonomi kekal mampan.

Mudah-mudahan Pakej Rangsangan Ekonomi Prihatin Rakyat ini memberi manfaat kepada semua rakyat Malaysia secara keseluruhannya, terutamanya golongan B40 dan M40 yang terlibat secara langsung dalam sektor pengangkutan.

DATUK SERI IR. DR. WEE KA SIONG
MENTERI PENGANGKUTAN MALAYSIA
27 MAC 2020

- TAMAT -